



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Glasgvensi Et Brechinensi Episcopis.

urn:nbn:de:hbz:466:1-20020

sub protectio-
ne sedis aposto-
licae.

citur, animo nos decet libenti concedere & juxta petentium voluntatem consentaneum rationi congruum suffragium imperitari. Eapropter, dilecti in Domino filij, vestris justis postulationibus clementer annuimus, & monasterium ipsum sancti Cosmae, quod ad jus & proprietatem beati Petri specialiter pertinet, ad exemplar felicitatis memoriae Celestini Papae praedecessoris nostri sub beati Petri & nostra protectione suscipimus & praesentis scripti privilegio communimus. In primis siquidem statuente ut ordo monasticus &c. usque illibata permaneant, in quibus haec &c. usque vocabulis Locum ipsum in quo praefatum monasterium situm est cum omnibus pertinentiis suis, Ecclesiam sancti Viti de Vicovaro cum omnibus pertinentiis suis, sanctae Mariae de Marcianello, sancti Petri de Ferrata, sanctae Mariae de Cantalupo, & sancti Felicis Ecclesias, cum omnibus pertinentiis suis, jus quod habetis in Ecclesiis sancti Salvatoris & sancti Nicolai de Cantalupo, Ecclesiam sancti Angeli de Rocca Iovere, quatuor denarios Papienses pro pensione ab eadem Rocca, in Vicovaro Ecclesiam sanctae Luciae cum pertinentiis suis, Ecclesiam sancti Januarij de Catania, cum pertinentiis suis, Ecclesiam sanctae Eugeniae cum pertinentiis suis, quinque denarios Papienses quos a monasterio sancti Clementis Tiburtini percipere debetis, casalem Cerriti Plani, & casalem in Martianello cum pertinentiis suis. Ad haec statuimus ut idem monasterium vestrum nulli nisi Romano Pontifici sit subiectum, nec ab eo quicquam ab alio aliquo Clerico seu laico exigatur, excepto uno prandio quod Tiburtino Episcopo cum septem tantum personis semel in anno, si ipsum ad monasterium vestrum forte venire contigerit, persolvatis. Chrisma verò, oleum sanctum &c. usque quod postulatur impendat. Praeterea quatuor molendina de Precis, quae sedent in pede ripae sanctorum Cosmae & Damiani, molendinum quod sedet sub fonte Piccaroli, sedium molendini in rivo de Runci, molendinum in eodem loco quod habetis cum Iohanne de Runci, & terram quam habetis in tenimento Sambuci, vobis nihilominus auctoritate apostolica confirmamus. Sepulturam praeterea ipsius loci &c. usque nullus obstat. Salva tamen iustitia illarum Ecclesiarum a quibus mortuorum corpora assumuntur. Decernimus ergo &c. usque usibus omnimodis profutura. Salva sedis apostolicae auctoritate. Ad iudicium autem hujus perceptae a sede

apostolica libertatis duas libras cere nobis nostrisque successoribus annis singulis persolvatis. Si qua igitur in futurum &c. usque districtae subjaceat ultioni. Cunctis autem eidem loco &c. usque praemia aeternae pacis inveniant. Amen. Datum Laterani per manum Iohannis sanctae Mariae in Cosmidin Diaconi Cardinalis S. R. E. Cancellarij Idibus Junij, Indictione xv. incarnationis dominicae anno M C C X I I. pontificatus vero Domini Innocentij Papae III. anno decimo quinto.

GLASGVENSI ET BRECHINENSI
Episcopis.

Dilecti filij H. Archidiaconus & Capitululum Ecclesiae Dunkeldensis, & Abbas de Scona, Prior de Insula, & universus clerus Dunkeldensis diocesis suis nobis litteris intimarunt quod bonae memoriae R. Episcopi eorundem viam universae carnis ingresso, ipsi convenientes in unum de substitutione Pontificis tractaturi, dilectum filium Iohannem Archidiaconum Laodoniae, invocata spiritus sancti gratia, in Episcopum sibi concorditer elegerunt, & carissimus in Christo filius noster Willelmus Scotiae Rex illustris electioni eorum benignum assensum praebuit, sicut ipsius litterae testantur. Unde dilecti filij R. & R. nuntij eorundem nobis humiliter supplicarunt ut cum praefata Ecclesia sedem apostolicam nullo mediante respiciat, electionem ipsam auctoritate apostolica confirmantes, ipsum faceremus in Episcopum consecrari. Verum P. nuntius venerabilis fratris nostri Episcopi sancti Andreae in nostra praesentia constitutus postulavit instanter ut cum de consuetudine hactenus observata idem Episcopus, ut dicebat, Episcopos Scotiae debeat consecrare, praefatum electum consecrandum ad eum mittere dignaremur. At nuntij memorati, bonae memoriae Celestini Papae ac nostrum privilegium allegantes, in quo continetur expressè quod omnes episcopatus Scotiae immediate apostolicae sedi subsunt, inter quos connumeratur & iste, asseruerunt quod praefatus Episcopus id sibi de jure non poterat vindicare. Sed & nuntius supradictus proposuit quod idem Episcopus super hoc apostolicae sedis erat scripto munitus. Quia igitur idem nuntius intentionem suam fundare non potuit, & Ecclesiae memoratae tamdiu differre consecrationem electi sui posset esse valde damnosum, fraternitati vestrae per apostolica scripta mandamus quatinus examina-

nata electione pariter & electo, si eam inveneritis de persona idonea canonicè celebratam, ipsam sublato appellationis obstaculo auctoritate apostolica confirmetis, & sine utriusque partis præjudicio alter vestrum, si ambo nequiveritis interesse, accersitis sibi duobus vicinis Episcopis, ipsum in Præsulem studeat consecrare, ac juramentum fidelitatis nomine nostro recipiat ab eodem sub forma quam vobis sub bulla nostra mittimus interclusam. Datum Laterani Idibus Junij, pontificatus nostri anno quintodecimo.

*POPULO MEDIOLANENSI,
spiritum consilij sanioris.*

M Irari cogimur & moveri quòd præteritorum immemores & improvidi futurorum, conversi estis in arcum perversum & in reprobum sensum dati, sacrosanctæ Romanæ Ecclesiæ matri vestræ devotionem & obedientiam subtrahendo, quæ vos multis beneficiavit honoribus & magnis beneficiis honoravit, & ei pertinaciter adherendo qui suis benefactoribus consuevit retribuere mala pro bonis, offensam pro gratia, & injuriam pro honore, sicut ex his quæ contra nos egisse dinoscitur potuistis pendere manifestè. An fortè putatis quòd alia vobis retribuet quàm reddidit ipse nobis? Nam si hoc fecit in viridi, quid in arido est facturus? Licet autem ex his quæ nunc agitis gratia nostra vos reddatis indignos, quia tamen mater oblivisci non potest filiorum utriusque sui, universitatem vestram monemus & exhortamur in Domino, per apostolica vobis scripta mandantes quatenus saniori utentes consilio revertamini ad devotionem & obedientiam matris vestræ, super excessibus vestris, & specialiter super eo quòd dilectos filios Ordinarios Mediolanensis Ecclesiæ nuper eicere præsumpsistis, Deo & nobis taliter satisfacere satagentes ut penam vitare possitis & gratiam adipisci. Datum Laterani Idibus Junij, pontificatus nostri anno quintodecimo.

*TRECENSI EPISCOPO, ET
Abbati Clarevallens Cisterciensis ordinis
Lingonensis diocesis, & magistro Henrico
Canonico Trecenti.*

DE prudentia Senonensis Archiepiscopi non possumus non mirari, qui post appellationem ad nos legitime interpositam, & contra nostri formam mandati, perversè processit in causa quam ad petitionem carissimi in Christo filij nostri Phi-

Tom. II.

lippi Francorum Regis illustris sibi duximus committendam super relaxanda sententia interdicti quod in terram ejus venerabiles fratres nostri Aurelianensis & Antifidiorensis Episcopi protulerunt, si prædictus Rex eis illud offerret quod esset merito acceptandum, & licet ipsi jusserimus ut, si fieri posset, postposito utrinque judicio ad amicabilem compositionem tenderet, ipse tamen, turbato negotio potius quàm sedato, nec compositionem facere studuit nec judicium exercere. Unde, nisi regis voluissimus serenitati deferre, taliter eum corripere curassemus quòd ejus profectò non remansisset impunitus excessus. Cum igitur quod ab eo est inordinatè præsumptum, ipso jure sit irritum & inane, discretioni vestræ per apostolica scripta præcipiendo mandamus quatinus ejus processum & quicquid occasione ipsius inveneritis attentatum, sublato cujlibet contradictionis & appellationis obstaculo irritum nuntietis, contradictores, si qui fuerint, vel rebelles per censuram ecclesiasticam appellatione postposita compescendo. Quòd si non omnes &c. tu ea, frater Episcopo, cum eorum altero &c. Datum Laterani Idibus Junij, pontificatus nostri anno decimoquinto.

ATREBATENSI EPISCOPO.

DVdum dilectis filiis Majore, Juratis, Scabinis, & universitate communie Laudunensis conquerentibus nostro est apostolatu referatum quòd dilecti filij electus & clerus Laudunensis alique viri ecclesiastici saepe in eos & in terras ac familias eorum excommunicationis & interdicti sententias sine causa rationabili ac juris ordine prætermisso promulgant, ipsos per hujusmodi sententias multipliciter contra justitiam aggravantes, licet super his de quibus impetuntur à quoquam sint exhibere parati quod postulat ordo juris. Nolentes igitur eosdem ecclesiastica distinctione indebitè prægravari, cum ex apostolicæ servitutis officio sublevare teneamur injustè depressos, eis & aliis auctoritate apostolica curavimus districtius inhibere ne in ipsos vel eorum quemlibet seu terras aut familias eorundem sine manifesta & rationabili causa excommunicationis vel interdicti sententias promulgarent, decernentes hujusmodi sententias, si quæ post appellationem ad nos propter hoc legitime interpositam fuerint promulgatæ, penitus non tenere. Quia verò eisdem conquerentibus intelleximus quòd præfati electus &

*Epist. 114.
Ejusdem argumenti cum epistola 63. libri 14.*

NNn